

COMMUNICAZIUN A LAS MEDIAS

Poschiavo, ils 28 d'avust 2026

Tariffas d'electricitad 2027: Las chasadas pajan in zic pli pauc

L'onn 2027 sa sbassan ils custs d'electricitad annuals per las chasadas en il territori da rait da Repower levamain. Il medem mument introducescha Repower pretschs d'energia stagiunals, investescha vinavant en ina rait da distribuziun effizienta e cumplettescha sia purschida cun la tariffa d'electricitad variabla Optima.

Ina chasada cun quatter persunas da la categoria da consum H4 da l'ElCom cun in consum annual da 4'500 uras kilowatt paja il 2027 inclusiv la TPV var 1'449 francs per l'electricitad. L'onn current èn quai radund 1'469 francs. Quai correspunda ad ina distgargia da 20 francs u 1,4 pertschient. Sch'ils custs d'electricitad sa sbassan propi en il cas singul, dependa dentant dal consum effectiv d'electricitad. En pli influenzeschan era las taxas communalas localas l'import final. La Repower metta a quint quellas per incumbensa da las vischnancas.

Pretschs stagiunals per in'energia regenerabla

Il product da standard Grischunpower differenziescha a partir dal 2027 tar la tariffa d'energia tranter stad ed enviern. L'enviern vala ina tariffa pli auta, la stad ina pli bassa. Il pretsch d'energia en media sur l'entir onn resta senza midadas cumpareglià cun l'onn current. L'effect individual da la concepziun stagiunala da las tariffas dependa da la moda, co ch'il consum d'electricitad da la singula clientella sa reparta sin la stad e sin l'enviern.

La concepziun stagiunala da las tariffas resguarda ch'i dat dapli energia regenerabla la stad e che las cundiziuns sin ils martgads d'electricitad sa differenzieschan tut tenor la stagion. La clientella survegn uschia in signal da pretsch transparent per spustar lur consum tenor pussaivladad en temps cun ina purschida d'electricitad pli gronda.

Optima cumplettescha la schelta da tariffas

Anc in pass vinavant va la Repower cun la nova tariffa d'electricitad variabla Optima. La clientella d'electricitad po sa decider voluntarmain per il 1. da schaner 2027 (communicaziun a las medias dals 24 d'avust 2026). Tar Optima varieschan tant il pretsch d'energia sco er il pretsch d'utilisaziun da la rait tenor il temp dal di. En quest connex è mintga ura attribuida ad in da trais stgalims da pretsch - verd, mellen u cotschen. Quels resguardan tant la disponibladad stagiunala d'energia regenerabla sco era la chargia spetgada da la rait electrica locala. Las uras da tariffa vegnan fixadas ordavant e restan senza midadas entaifer in quartal.

La clientella cun smart meters po uschia spustar intenziunadamain il consum planisabel, per exempel per chargiar in auto electric u far ir ina pumpa da chalur, en uras verdas ed uschia pli favuraivlas. Uschia po ella sbassar ils custs d'electricitad ed il medem mument reducir chargias maximalas da la rait.

Investiziuns en ina rait segira ed effizienta

L'engrondiment d'implants fotovoltaics, pumpas da chalur e l'electromobilitad pretendan dapli da las raits d'electricitad. La Repower investescha perquai radund 30 fin 40 milliuns francs ad onn en rinforzaments da la rait, novas staziuns da trafo e tecnologias modernas da smart-grid. Questas investiziuns permettian d'integrar energia regenerabla supplementara e segireschan il provediment d'electricitad fidà a lunga vista.

Las tariffas d'electricitad 2027 detagliadas e liantas èn disponiblas sut repower.com/tarife.

Da tge elements sa cumpona il pretsch d'electricitad?

Il pretsch d'electricitad sa cumpona da pliras parts: da l'energia furnida, da l'utilisaziun da la rait electrica e da la mesiraziun sco era da taxas e d'ulteriurs custs dads. Latiers tutgan per exempel ils servetschs da sistem per in attatg a la rait segir e la reserva d'electricitad per rinforzar la segirezza dal provediment. La lescha reglescha tge custs che las tariffas dastgan cumpigliar e co ch'els vegnan calculads. Sin basa da questas prescripziuns e dals custs decisivs vegnan las tariffas eruidas mintg'onn da nov.

Contact

Stefan Bisculm

manader post da medias

t +41 81 423 77 00

stefan.bisculm@repower.com

Quai è Repower

L'interpresa Repower è dapi 120 onns activa sco producenta d'electricitad, manadra da la rait da distribuziun e commerzianta d'energia. Ses martgads-clav èn la Svizra e l'Italia. La sedia principala sa chatta a Poschiavo. Ulteriuras filialas ha ella a Bever, Glion, Grono, Küblis, Landquart, Turitg e Milaun. Repower è activa lung l'entira chadaina da valurisaziun da l'electricitad, da la produenziun sur il commerzi fin a la distribuziun e la vendita, ed er en la fatschenta da gas. Repower è la pli gronda interpresa da provediment d'energia en il chantun Grischun, nua ch'ella posseda e gestiunescha pliras ovras idraulicas. En l'Italia è Repower ina da las pli grondas furnituras d'electricitad e da gas per interpresas. Il portfolio da l'interpresa en l'Italia cumpiglia plirs parcs da vent e parcs solars ed in'ovra electrica cumbinada cun gas. Mantegnair ed amplifitgar las energias regenerablas è ina part integrala da la strategia da Repower. Quai vala era per il svilup persistent da l'interpresa en ils secturs economia, societad ed ambient.